

Rene Herde

De Vuyst na San Nicolas ya tin e infraestructura cu henter Aruba tin cu haya Yara y Madiki ta sigui !



E plan pa renoba barionan rond di Aruba ta canando bon. Den tur tranquilidad algun bario rond di nos isla ya ta hayando un cambio asina grandi, cu hopi hende ainda no por kere. Loke a wordo anuncia como parti di e proyecto grandi di “BO BARIO”, ya ta visibel den algun bario. Den e bario di De Vuyst na San Nicolas, e cayanan di santo a wordo transforma den cayanan di klinker, cu seccionnan separa pa hende cana y pa core bicicleta. E ‘fietspad’ ta separa for di e caminda pa auto. Tin seccionnan apart pa para auto na un banda di caminda y partinan special pa crusa caya (“zeebrapad”). Entre e “fietspad” y e caminda pa cana, tin un pida tereno habri pa pone mata y cu lo fungi como area pa awa riba e caminda por bay. Ya por wak con bunita y ordena e caminda nan ta keda y cuanto espacio tin pa esnan cu kier para auto, core bicicleta y cana canto di caminda. Una bez cu pone e lusnan di caya y e matanan banda di caminda, e barionan lo bira ainda mas atractivo pa biba. E interes pa biba den e barionan renova ya ta subi y cu e renovacion esaki sigur lo aumenta.

BO BARIO

Cu e plan di BO BARIO kier logra diferente meta. E meta general ta pa mehora e area cu nos hendenan ta biba aden y asina haci e barionan caminda famianan ta biba y lanta nan yiunan, lugarnan agradabel y

sigur pa nan mes y nan yiunan. Un otro meta t’e creacion di espacio pa construccion di cas. E demanda pa traha cas ta grandi. Hopi famia hoben kier yega na nan propio cas, pero tabata dificil pa haya tereno, pasobra esaki ta limita. Enbez di duna tereno los, Gabinete Mike Eman ta crea barionan cu un bon infraestructura di caya y arenan di recreacion, cu ta e rekisitonan fisico pa un bon bario cu awor aki hopi bario no tin. Na mesun momento ta traha hunto cu e habitantenan di e barionan, pa nan sera conoci cu otro y tuma organizacion di e bario den nan man. Di e forma ey ta crea e condicionnan fisico y social pa barionan por bira y keda lugarnan agradabel y sigur pa henter famianan biba.

APENAS A CUMINSA

Den e prome fase di e plan BO BARIO lo renoba 21 bario rond di nos isla. Ya ta trahando den otro barionan manera Yara y Madiki. E preparacion pa otro barionan ta tumando lugar. E inversionnan den e proyectonan aki ta grandi y ta parti di e maneho pa renoba henter nos isla. E fondonan financiero p’e renobacion di nos barionan ta bini parcialmente for di Fondo pa Desaroyo y presupuesto di Gobierno di Aruba. Asina pueblo porfin ta wak unda nan placa ta bay. Den e luna y añanan nos dilanti ta bay sigui cu e renobacion di barionan tur rond di nos isla.

Varios persona di San Nicolas honra cu un caya na nan number

Asina nan legado ta keda bibo pa generacionnan cu ta bin

DEN proximo lunanan nos dilanti Gobierno ta bay honra varios persona procedente di San Nicolas y becindario cu un caya na nan number. Aña pasa na luna di november a honra Alicia Godett cu un caya, dunando aprecio n’e persona special aki. Caya J. van Stolsbergstraat a haya number di Alicia Godett. Tabata un dia di hubilo pa tur cu a conoce y no a

conoce Alicia, pero cu a tende di dje y tur loke el a nifica pa hopi, grandi y chikito. Un persona hopi conoci p’e pueblo di San Nicolas ta Fernando Muller, kende tabata eherce e deporte di boxeo bou di e number ‘Sugar Boy Nando’. Ken no conoce Sugar Boy Nando? Un boxdo di taya cu a hiba

number di Aruba tur parti di mundo na unda e tabata competi. Na 1960 e legendario Rocky Marciano a bula bay Corsou pa mira Sugar Boy Nando bringa eynan y kier a hibe Merca cune. Banda di tabata un boxdo di fama Sugar Boy Nando tabata un pianista talentoso. Un otro figura cu pronto ta bay haya un caya na su number ta

George Rafael Pantophlet, otro boxdo conoci di San Nicolas. E number di Pantophlet den e ring di boxeo tabata di Battling Siki. El a traha pa mas di 30 aña na Lago, a biba na San Nicolas na unda el a cria y lanta su famia. Na 2011 el a fayece na edad di 81 aña na Sint Maarten. Gobierno ta sigui honra hendenan cu di un of otro forma a nifica hopi pa pais Aruba, cu ta

nifica hopi pa nan bario y nan becindario. Esnan cu ta pronto ta bay haya un caya na nan number ta sali di e mundo musical, spiritual, cultural, comercial y di enseñansa. Pronto e nombrenan ta bay wordo divulga. Nombrenan mara na un historia, un legado cu nan a laga atras pa generacionnan cu ta bin.